



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 6

US aircraft carrier ka South Korea tongogo

Assam unit APP nung tir Bhaban Choudhury kumogo



VOL. XXII ISSUE NO. 138 (ADOK 138)

DIMAPUR

TENTONÜ (MONDAY)

METSÜREMI (MARCH) 03, 2025

₹ 5.00

Tanü nungi NLA budget session tenzüker

Kohima, March 2, 2025 (TYO): Nagaland nung NDPP-i anir party ajaki akümbe sorkar budget session 2025-26 Hombar nungi tenzüksü.

Governor La. Ganesan-i o jemibiba sülen budget session tenzüksü aser iba sülen asür MLA tem bilemteta tetushi agütsütsü ta Assembly Secretariat-i metetdaksüogo.

Governor indang onük atema Mongulbarnü olemteptsü aser kasa anogo nung Chief Minister Neiphiu Rio-i 2024-25 atema supplementary demand for grants benoktsü.

Neiphiu Rio-i finance portfolio bona lir aser paisa financial year 2025-26 atema budget sayatsü aser Hokolbarnü olemteptsü.

Hopta ka piyong budget

session tatembang anogo nung CM Rio-isa Comptroller Auditor General of India indang report agütsütsü.

Tan session nung Bodbarnü sodi alitsü aser akhi ama question hour, discussion on matters of public importance, laying of annual administrative reports of government departments, introduction & passing of government bills maparen inyaksü.

Olemtepdang public atema tongtipang onüktem ano merenem lir saka Foothill road, NHIDCL-i inyakba highway mapatongtem, Naga yimten tebilemtsü, Centre-i Protected Area Regime benokba aser Indo-Myanmar arrtsü nung Free Movement Regime alenbangba onüktem benoktsü imlar.

NFRCC & PWD ken o ajanga mapatong nung timtem ajurutsü: NPCC

Dimapur, March 2, 2025 (TYO): Wokha kübok Foothills Road mapatong atema Nagaland Foothills Road Coordination Committee (NFRCC) den implementation agreement nung sign asütsü memulungba ajanga iba mapatong nung timtem tuluka ajurua lir ta Nagaland Pradesh Congress Committee (NPCC)-i metetdaksüogo.

Iba ya NFRCC aser Public Works (R&B) Department tsüngda ken o adoka ajanga sayur. Iba ken o ya tekaratiba nung mangatettep nungbo Foothills Road mapatong nung tetsükdaksü ajurutsü aser nübortemi teimla aser sarasadem amajok kümdaktsütsü ta Communications Department,

NPCC-i sangdong ka nung ashi.

Iba mapatong den sendaktepa alir ajaki inyakyim metongshitsüla aser bangdak department-i iba mapatong nungi NFRCC agentsü merangba anentsüla ta NPCC-i ayongzükogo.

NFRCC-i küm aika iba mapatong asangsang nung ataloka mapa inyaka arur aser parnok ya Nagaland nung alirtemi shimetba nübortem lir. Anungji iba mapatong nungi NFRCC tashi agentsü merangra iba teraksa ji meyanglutettsü aser asenok sasa tamakok anguba ama asütsü ta parnoki tekümdangtsü olen ka ashi.

Tang adoka aliba ken o ya implementation agreement nung sign asütsü memulungba ajanga

lir. Ajisüaka iba ya tanga tebilemba kecha atema masü saka mapa junga inyaksü aser mapang shitak nung mapatong tembangtsü atema dang lir, ta NPCC-i ashi.

Sorkari yimsü süa arudang ochimashi aser timi ketdangsüba mapa meinyakba ajanga mapatong aika merenemtet aser meinyaki lir aser iba ajanga NFRCC-i contractor tem dang implementation agreement nung sign asütsü rongshir ta parnokisa metetdaksü.

Bangdak ketdangsürtemi iba tekong merangtepba anentsü aser NFRCC den ano tanga civil societies-i shilem agia aser lenisüa aotsü atema lenmang ka bushiteptsü ayongzükem ka NPCC-isa ashi.

New Education Policy ajanga Hindi mebenoktsü

New Delhi, March 2, 2025 (Agencies): New Education Policy ajanga state tem dang Hindi amshiang ta özüng magütsütsü aser Tamil Nadu-i yimtenren tsütsü shir NEP anema noktaker ta Union Education Minister Dharmendra Pradhan-i ashi.

"NEP 2020 nung Hindi dang amshitsü ta onoki kodanga shia mali. Onoki pei tetsü oshi nung ajemdaker shisaliok agütsütsü ta dang shiogo aser Tamil Nadu nung Tamil oshi dang asütsü" ta Pradhan-i ashi.

NEP tenzüksüba aser three-language policy atema Tamil Nadu aser Centre tsüngda tekong merangtepa toktepba mapang ka nung Union Education Minister-i iba ya shiogo.

"Nisung kari yimtenren taginüba kar atongtsü merangba

atema kecha mejembünür. NEP 2020 ya India nung oshi balala nung temulung agüja yangluba lir. Hindi, Tamil, Odia, mesüra Punjabi süang oshi ajak kasa tongtipang lir. Tamil Nadu nung nisung kari politics ajanga NEP magizükem" ta Pradhan-i ashi.

"Artificial Intelligence putu ka nung school tem nung third language ama oshi ka benshitsü memerangtsüla" ta Tamil Nadu Chief Minister MK Stalin-i shiogo.

"Advanced translation technology ajanga oshi tenokdangba khen nung agiener. Kakeshirtem nem oshi talila agi mekangshidaktsütsüla" ta Stalin-isa ashi.

BJP-i north India nung nisung ajaki Hindi oshi angazükdaktsütsü meranger ta DMK lennir Stalin-isa shisem.

Arambai Tenggol-i Union Home Minister aser Governor nem tenüngsang agütsür

Imphal, March 2, 2025 (Agencies): Manipur nung Meitei nunger telok Arambai Tenggol (AT)-i Union Home Minister Amit Shah nem tetnüngsang agütsüogo.

Home Minister Amit Shah-i Honibarnü senden ka ayonga amendang armed forces dang Manipur nung security akangshitsü, arrtsü atsüdagba mapa tajungba inyaksü aser drug shishilembaba azüoktsü tetuyuba agüja liasü.

Shah-isa March 8 nungi Manipur nung lenmang ajak public movement atema lapoktsü tetuyuba agütsü.

Manipur nung free movement alitsü atema national highway ana lapokshitsü lemtetba atema tenüngsang

agütsür. Iba ajanga connectivity aser accessibility tajungba akümtsü ta Arambai Tenggol-i ashi.

Indo-Myanmar arrtsü atsüdagba mapa tembanga inyaksüla kechiyong iba ajanga litsü kümzüka ayutsü aser security tajungba akümtsü ta parnokisa ashi.

Arambai Tengol-isa Manipur Governor Ajay Kumar Bhalla dang mapa shitak inyakba atema pelaba metetdaksü.

"Governor Bhalla-i drug shibelenba anema akangakanga noktakba aser Manipur ya drug-free state kümdaktsütsü merangba pusema nungiter. Tensa tajungba akümtsü atema özüng alema yangluba bunkers raksatsütsüla" ta AT-i ashi.

ACF-i temelaba meliaka APFRA anema lungkak aittsü



Itanagar, March 2, 2025 (Agencies): Arunachal Christian Forum (ACF)-i ashishitep aketba Arunachal Pradesh Freedom of Religion Act (APFRA) 1978 magizükem aser iba anema Itanagar nung Legislative Assembly jakdang timi lungkak aittsü metetdaksüogo.

Arunachal Pradesh nung Budget session mezüng anogo March 6 nü parnoki iba sentong agitsü lemteta lir.

"Onoki timi lungkak aittsü kechiyong iba ya özüngi melar. Capital administration-i iba sentong atema temelaba magütsür saka ACF-i iba lemtet nung akangakanga noktaka lir" ta ACF President Tarh Miri-i ashi.

"Onok ya yimjung meimertem, Tsüngrem tsüburtem aser özüng akhümtsübuba sensotem li. Onokisa March 6 nü Budget session tenzükbaba anogo nung Legislative Assembly kima nung lungkak aittsü" ta pai ashi.

Sorkari Act yanglushitsü atema shisadangtsü ta Arunachal Pradesh nung Home Minister Mama Natung-i ashir saka iba ya

APCF-i magizükem. Natung-i Indigenous Faith Department repsema inyaker.

Arunachal Pradesh nung mezüngbuba Chief Minister, P.K. Thungon kübok küm 47 tejakdang APFRA yanglu.

Ajisüaka 1978 nungi iba özüng ya küm tenem shi mebenshii dang aruya lia Gauhati High Court-i Arunachal sorkar dang iba özüng mapa küma tenzüksü atema inyakyim latettsü tetuyuba agütsü.

Iba Act nung "conversion" ya tamangba yimsü ka toktsür tanga ka agizükba ta shia lir. Act nungsa indigenous faiths nung Buddhism, nature worship, aser Vaishnavism ta shimeteta lir saka Christianity medensem.

Arunachal nütsüng yongsük (2011 Census) nung Khristan tamangertem 30.26% ta shia lir aser parnoki ashiba agi iba Act ya Khristantem anema aser religious freedoms azüoktsü atema benshitsü akok ta ashir.

ACF-i APFRA mapa küma tenzüksü memulunger aser parnoki February 17 nü Naharlagun nung ghonda 8 lumia

lungkak aitogo.

Külen, Chief Minister Pema Khandu-ia nübortem dang özüng aibelena memeyipzüktsü ayongzükogo.

"Iba Act ya tamangba yimsü inyakyim azüoktsü atema masü saka sobaliba senmang wazüka ayutsü atema yangluba lir" ta Khandu-i ashi.

"Khristantemi tera yanglushiba magizüktsü. Iba ya küm 46 tashi rarayonga aruba tongpang ka lir. Anungji senden ka nung dangbo tangatettep dangi marutettsü. Onoki olemtep pelashishia agizükem saka Act yanglushiba magizükem" ta ACF Secretary-General James Techhi Tara-i ashi.

Arunachal Pradesh sorkari indigenous faiths nung Christianity medensemaba atema ACF-isa aitsüogo.

"Onok yangi tamangba yimsü lemsatsü atema aruba masü. Onoki telongjem aser yimjung dak amanger. Arunachal Pradesh nung Khristantem ya lisopurtem lir aser onok agizüktsüla" ta ACF President Tarh Miri-ia metetdaksüogo.

Delhi nung Angami nungeri Sekrenyi benjung amung



Dimapur, March 2, 2025 (TYO): Delhi nung alir Angami nungertem March 1, 2025 nü Nagaland House New Delhi nung Sekrenyi Festival mungogo.

Iba benjung ya Angami Krotho Delhi ajanga ayongzük aser tanur taintemi shilem agia liasü.

Angami kin indang aliba aser inyaksangshi wazüka ayutsüba dang masü saka tesentaktep akangshiteptsü aser Sekrenyi amongba tetezü

metetdaksütsü atema iba sentong ayonga agi.

Iba sentong nung panel discussion ka liasü aser idangji tesüiba nung benshia aruba inyakyimtem asentenshitsu aser Khristan tamangba den meputepbatem indang lemsatepa liasü.

Panel discussion nung onirji Dr. Kevisetuo Dzeyie liasü aser Pastor NCF Delhi Rev. Dr. Noulezhalie Ricky Medom, Deputy Director Information & Public Relations, Government

of Nagaland Kuolie Mere aser Vikhlie Terhüja o Medovisienuo Dahou nungeri shilem agia liasü.

Sentong nung President AKD Kevijalie Belho-i tesentepertem pelaa agizük Naga Christian Fellowship pastor Rev. Dr. Noulezhalie Ricky Medom-i temoatsü meshia sarasadem aser Kethosinuo Tapa-i anküp tepela o jembi.

Sekrenyi benjungmong nungsa Open Naga Wrestling tetoktepba ka ayongzüka liasü.

Dimapur nung Alima Tetsü Oshi Anogomung amung

Dimapur, March 02(TYO): Alima ajunga nung tetsu oshi anogomung koba dang (International Mothers' Day) ta ajar, iba anogomung Feb. 21 nü alima ajunga den külemi Dimapur nung Dimapur Ao Lanur Telongjemi Tetsü Oshi Anogomung Silver Jubilee mungogo. Alima nung tetsü Oshi Anogomung ya United Nations-i anir 2000 kum amungtsü tenzükba lir.

Iba anogomung nungtem nung, asen oshi wazüka benshitsü aser lanurtem nem tesü oshi angazükdaksütsü nükjidong nung Dimapur Ao Lanur Telongjemi (DALT) kum ishika tejaklen Ao oshi nung mongintem kar shimer, oshi-oben committee ka tentet aser parnoki tanurtem Sunday school nung angazükdaksütsü asoshi Ao oshi nung kaket adoka ibaji züngdaksüa arudagi

Taküm kum Silver Jubilee

anogomung Omen "Oshitemya tongtipang" (Languages matter) agüja aliba nung shilem agia Dimapur Watsü Telongjem aser Dimapur Ao Lanur Telongjemi orasa (essay) onük: "Kaketshir kaji pei tetsü oshi metettsü tongtipang" nung tetoktepba ka Ao oshi nung Feb. 21, 2025 nu anepdang 8 ako nungi nikongdang 5 ako tashi online ajanga Sunday school tanurtem class 8-10 nung azüngertem asoshi ayongzüka shilem agidaksü aser sempet (prize money 1st, 2nd & 3rd) renema agütsüogo .

Iba Orasa tetoktepba nung takok angurtemji itemji liasü : Mezüng takok jenjang :

1. Sentimong P Kichu Grade 10 (class 8) Duncan Fellowship, CEM
2. Kitimenla Changkija Grade 11(IX), Dancun Fellowship, CEM

Tanabuba takok jenjang :

1. Akangjungla A Jamir ABC Diphupar, Grade 12(class 9)
2. Yimlimaong Grade 11, Duncan Fellowship, CEM

Tasembuba takok jenjang :

1. Impunenla Pongen Grade 12, ABCD
2. Imlipen Aier Grade 10, ABCD

Tanurtem shirnokisa iba tetoktepba nung shilem tajung agiogo nenok ajak dang kanga pelar aser takok angur nem tenungsang agutsur. Iba den külemi ano Watsu nungi aser Lanur shirnokisa iba tetoktepba nung yariogo nenok danga Kanga pelaba metetdaksür ta DALT sangdong ka ajanga metetdaksü.

" Maneni asenok ajaki asen tetsü oshi wazüka tali tajungba nung renloka odaksütsüji asenok ajak khuret aser mapa südi , " ta parnokisa ayongzük.

Mizoram nung telungpurtemi khasetertem bilemteta tetushi agütsü



Imphal, March 2, 2025 (Agencies): March 2, 1966 nü Mizo National Front (MNF) telungpurtem amakdang tasütait sepai pezü khasetba bilemteta Deobarnü Manipur nung wreath-laying ceremony ka agiogo.

Iba sentong ya Assam Rifles (South) Headquarters ajanga

Sehlon, Chandel District nung ayongzük aser Jemadar Lal Bahadur Viswakarma, Rifleman (Rfn) Jit Bahadur Thapa, Rfn Sarbadhan Sunar, o Rfn TKC Varkey nunger nem tetushi agütsü.

1966 nung parnok pezüi Aizawl, Mizoram nung Counter Insurgency Operation ka

inyakdang taküm bendanga agütsü.

February 28, 1966 aonung MNF telungpurtemi Aizawl nung district treasury aser police camps dena Mizoram kübok tongtipang tesem aika amak.

Iba sülen telungpurtemi Aizawl nung aliba Assam Rifles Battalion Headquarters amak.

MNF telungpurtemi school ka anasa Jemadar Lal Bahadur Viswakarma lenisüba kübok patrol party ka amak. Idangji Viswakarma, Rfn Thapa, Rfn Sunar, aser Rfn Varkey nunger kanga mejungi yiruja liasü.

Tanü ayonga agiba sentong nung Assam Rifles ketdangsürtemi tasürtem nem tetushi agüja naro yutsü. Iba sentong nung Assam Rifles personnel 120 temai shilem agia liasü.

NSCN/GPRN-i Vitokhu Yeptho nem sodi agütsür

Dimapur, March 2, 2025 (TYO): NSCN/GPRN-i February 26, 2025 nungi tenzükba Ino Vitokhu Yeptho national service nungi sodi agütsür.

Ino Vitokhu ya L. Hotovi nunger Lukishe Yeptho'er jabaso lir aser pai NSCN/GPRN nung Tatar ama inyaka aruogo MIP, NSCN/GPRN

(Niki) sangdong ka nung ashi. Vitokhu Yeptho-i linük tenzükba wadang nung bendanga agüja inyakogo aser iba ya Naga putiotsü nung teti atema zülüoka ayutsü ta parnokisa ashi.

Parnokisa Vitokhu dang National Tatar Hoho ket nung discharge order agütsütsü metetdaksüogo.

Dimapur 24/7-i Naga Gaon nung teyari agütsü



Dimapur, March 2, 2025 (TYO): Dimapur 24/7 nungi telok kati Naga Gaon nung kitsükkirong lendong ajanga takoksa ajurutem semdanga teyari agütsüogo.

February 26, 2025 nü mi lendong nung ki 40 tashi rongdoka liasü aser iba ajanga nisung 200 shi kongshia lir. Ki rongdoker rongnung 80% tashi Naga nunger aser tanüngbaji non-Naga nunger lir.

Dimapur 24/7 teloki jang (50 seret tenemem) bosta 5, piyaz

(50 kgs), aser alo (50 kg) teyari agütsü. Item relief materials ya Naga Gaon Council Hall nung Gaonbura aser Naga Gaon Colony Council president na ket nung agütsüogo.

Dimapur 24/7 chairperson Annie Jain lenisüba kübok takoksa ajurutem den külemi noktakba aser sasa bilemba metetdaksü.

Iba lendong asoshi arogotem, NGOs, aser kijatemi tenla agütsür saka tang tashi nung sorkar nungi relief kecha mangu lir.

Akashvani Mokokchung nung shisalemsatep sentong aka



North East Zone (NEZ), Guwahati, Additional Director General (ADG) (A, BO & CO), Ashish Bhatnagar-i Akashvani Mokokchung semdangba anogo sentong nung adenertem külemi tangokba noksa.

Mokokchung, Metsüremi/ March 02(TYO): North East Zone (NEZ), Guwahati, Additional Director General (ADG) (A, BO & CO), Ashish Bhatnagar-i 2025 March 01 nü Akashvani Mokokchung semdang aser iba nungtem nung sentong ka Whispering Winds, Mokokchung nung kanga dang akhümкета agiogo.

Iba sentong nung Additional Director General (ADG) Ashish Bhatnagar-i Akashvani ya linük nübur tenzükba mapa tongti ka lir, iba ya ajanga nüburtem den osangtsüsang agütsüba den ano shisatsü agütsüba mapa tulu inyakerta ashi.

Paisa Akashvani ajanga nübur ajak den sentakteper aser North East India kisüng nunga

oshi 90 agi nüburtem den osangtsüsang lemsateper aser iba ya television channel kechaia ibaji meinyakteter. Akashvani ya Prime Minister aser sorkar aser nüburtem ajak asoshi tongtipang osang prokshiba aser talisa iba ya ajanga nübur aser sorkar tsüngda apu alarta lemsatep.

Kasa sentong nung Abino Lasuh, Head of Program (HOP), Akashvani Kohima, Lemjan Phom, PEX Pasighat tenatia mapang tatsütsü agia jembiba den Habemo Ngullie, PEX, Akashvani Mokokchung ajanga tarur pela agizüka jembiba aser sobaliba kenten aser sobaliba saya balala agia iba sentong kanga dang tobur junga agia liasü.



March 02, 2025 nü Patna nung Communist Party of India (Marxist-Leninist) (CPI-ML) National Secretary, Dipankar Bhattacharya-i 'Badlo Bihar Mahajutan' rally nung jembidang tangokba noksa nung angur.

Asha workers nem gratuity agütsüba mezüngbuba state ji Andhra lir

Vijayawada, March 02 (Agencies): Asha workers nem mezüng gratuity agütsüba state ji Andhra Pradesh state kümogo. Assembly election mapang nung chief minister N Chandrababu Naidu-i nangzükba ama tang atangji iba tenangzükba ataloktsür. India nung Asha workers nem itasen teimtiba agütsüba state jia Andhra Pradesh lir. Iba state nung Asha workers nem itasen 10,000 agütsür. Tanga state tem nungbo asha workers nem itasen kanga ajema agütsür; Uttar Pradesh

nung itasen 750 dang agütsür, West Bengal aser Delhi na nung itasen 3,000, Kerala nung itasen 5,000 aser Telangana nung itasen 7,500 agütsür. Asha workers mapa inyakba küm 30 abensaba sülen parnok nem gratuity sen lakh 1.5 tashi agütsütsü. Sorkarisa maternity leave anogo 180 agütsütsü lemtetogo aser leave mapang nung parnok nem itasen 60,000 agütsütsü. State sorkarisa mapa nungi anisüngzükba sülen-a senotsü teyari agütsütsü, auxiliary nurse midwife shimba mapang nung parnok nem maongka

balaka agütsütsü aser social security schemes ajak agütsütsü. State health department senden amendang Asha workers taküm jenjang tajungba kümtsütsü atema o lemtepba sülen Chief Minister-i Asha workers nem gratuity agütsütsü agizüka liasü, ta Honibarnü ketdangsertem osang ka ajanga metetdaksü. Health minister Satyakumar Yadav-ia, item teyari balala agütsüba ajanga Asha workers-i mapa tajung inyakba atema parnok züngshiba shisanger, ta ashi.

Centre-i southern states nung menden ajemtsüner: DK Shivakumar

New Delhi, Metsüremi/ March 02 (Agencies): Amongnü Congress lenir aser Karnataka nung deputy chief minister, DK Shivakumar-i linük tesem ajaklen delimitation inyakyim aija, Centre sorkari south tsütsü aliba state tem nung Lok Sabha menden ajema kümtsütsü tebilemba lir, ta metetdaksü. Shivakumar-i, "Congress party-i delimitation anema nokdaker. Parnoki (Centre) Southern states nung menden ajema kümtsüner. Parnoki inyaksangshibaji ajanga onok mepelar. Nüburtem atema onoki court nung Election Commission anema raratsü. South tsütsü aliba state tem nung menden ajema kümtsübaji tim masü," ta ashi. Delimitation inyakyim ajanga

parliamentary menden melenshitsü aser ibaji ajanga south tsütsülen aliba state tem kongshitsüa akok ta jembidar. Brihostibarnüa Shivakumar-i, Congress-i 'one nation, one election' anema nokdaker aser women's reservation pusemer, ta metetdakja liasü. "Ozü party tangatetbaji tejangja. Onoki One Nation, One Election anema nokdaker. Onoki women's reservation atema nokdaker," ta pai osangbenertem nem metetdakja liasü. Tamil Nadu nung delimitation dak sendakba nung tasüngdangba ka langzüdang Shivakumar-i, "Iba inyakyim benoktsü atema two-thirds majority nüngdaker. Two-thirds majority mali, anungji ibaji

mataloktsü," ta metetdaksü. Ano külen Karnataka Chief Minister, Siddaramaiah-i, Union home minister Amit Shah-i delimitation inyakyim ajanga southern states mekongshitsü, ta ashibaji tiyazü, ta metetdaksü. "Home minister-i jembiba oji ajanga pai osang mejangjaba shisanger Karnataka, Telangana, Tamil Nadu, Kerala aser Andhra Pradesh ama south tsütsü aliba state tem anema inyaktsü tebilemba lir," ta Siddaramaiah-i metetdaksü. Paisha, "Union sorkari southern states atema tajung bilema lira delimitation ji nütsüng sasep nung asütsü asü tang aliba Lok Sabha mendentem sasep nung asütsüar, ibaji home minister-i jangjashitsütsüla," ta metetdaksü.



Chamoli, March 02, 2025: Chamoli district kübok Mana area nung tenemlen nungi rürjep tulu anenzüka aluba lendong nung yirur ka Joshimath nung aliba Military Hospital nung treatment agidang tangokba noksa nung angur. Tenemlen nungi rürjep tulu anenzüka aluba ajanga aayanger aika anenbanga liasü.

Jordan aser Israel arrtsülen India nungi Kerala nunger ka khaset

New Delhi, March 02 (Agencies): Jordan aser Israel na tsüngda arrtsülen India nungi Kerala nunger ka khasetogo, ta par kibong züngsemtemi metetdaksü. Nisungbaji arrshi küm 47, Ani Thomas Gabriel lir aser pa ya Thumba nungi lir. March 1 nü Gabriel'er kinüngertemi pa asüba osangji Indian Embassy nungi yokba email ajanga meteta liasü. February 10 nü Jordan nunger sepaitemi arrtsülen injang khaloktsüba mapang nung Gabriel khaset, ta osang angazüker. Kasa lendong nungji Gabriel'er kinünger, Edison-a injang agi yirua kidangi shilang. Gabriel aser Edison na densema nisung pezü Jordan

ajanga Israel-i aotsü meranga liasü. Par pezü jagi ita asem visa ajanga Jordan-i oa liasü. Jordan sepaitemi parnok arrtsülen anguba mapang nung parnoki ajentsü merang, ibayongji sepaitemi parnok dak injang khaloktsü. Gabriel injang agi tekolak kanga mejungi yiru aser Edison tetsüng yirua Jordan nunger military hospital ka nung treatment agiba sülen pabo India-i yoka liasü. Edison India-i meyipa aruba sülen ang Gabriel'er kibongi pa Jordan linük nung alibaji meteta liasü. Iba sülen Indian Embassy-i iba osang metetpelaba sülen Gabriel'er kibong nem pa asüba osang metetdaksü.

LIST OF SELECTED PARTICIPANTS FOR STATE HANDLOOM EXPO AT URBAN HAAT, DIMAPUR. W.E.F. 06TH MARCH TO 19TH MARCH 2025.		
Sl.No	Name of the participants	Address
1	Mone Handloom	Sivasagar, Assam
2	Alok Das	Golaghat, Assam
3	Rumi Saikia	Jorhat, Assam
4	Amvya Khatun	Barpetta, Assam
5	Muchida Begum	Nagaon, Assam
6	Deepa Gogoi	Guwahati, Assam
7	Meenmay Das	Guwahati, Assam
8	Imtezar Ali	Bhadohi, U.P
9	Ngampoh	New Delhi
10	K. Marbenla	New Delhi
11	Hushika Yeptho	Zunheboto, Nagaland
12	Lily Sote	Kohima, Nagaland
13	Apenla	Mon, Nagaland
14	Akavi Chophy	Kuhuboto, Niuland, Nagaland
15	Ilika Jakha	Homeland Village, Niuland, Nagaland
16	Yashinenla	Changtongya, Nagaland
17	Nesute U Wezah	Chizami, Phek, Nagaland
18	Ivuto Aye	Zunheboto, Nagaland
19	Lily Ayemi	Chumoukedima, Nagaland
20	Angyung Konyak	Mon, Nagaland
21	I. Bendangmongla	Mokokchung, Nagaland
22	J. Amenla Jamir	Kohima, Nagaland
23	Tokali V	Zunheboto, Nagaland
24	Atoholi	Niuland, Nagaland
25	Bendangnaro	Mokokchung, Nagaland
26	Kelhouziengu U Mechulho	Kohima, Nagaland
27	N. Kaheli	Zunheboto, Nagaland
28	Longrila Anar	Kiphire, Nagaland
29	Punalemla	Mokokchung, Nagaland
30	Kumghatoli	Zunheboto, Nagaland
31	Elizabeth	Phek, Nagaland
32	Washimenla	Mokokchung, Nagaland
33	Obed Aye	Zunheboto, Nagaland
34	I. L. Amenla	Mokokchung, Nagaland
35	Matsungsenla Pongener	Kohima, Nagaland
36	Senlimongla	Mokokchung, Nagaland
37	Kheliho S Zhimomi	Zunheboto, Nagaland
38	T. Tsatongla Sangtam	Kiphire, Nagaland
39	S. Akanglemla	Mokokchung, Nagaland
40	Bethel	Zunheboto, Nagaland
41	Amenla Jamir	Changtongya, Nagaland
42	Temsuchila	Mokokchung, Nagaland
43	T. Litsaba	Kiphire, Nagaland
44	Benimongba	Mokokchung, Nagaland
45	Kazhevi	Zunheboto, Nagaland
46	Temsurenla	Mokokchung, Nagaland
47	Imlinenla	Changtongya, Nagaland
48	Lipongla	Kiphire, Nagaland
49	Initoli Y Achumi	Zunheboto, Nagaland
50	Nungsangmenla	Mokokchung, Nagaland
51	Ketoukuo U Sote	Kohima, Nagaland
52	Mughavi Y Sumi	Zunheboto, Nagaland
53	Repachila	Mokokchung, Nagaland
54	Jesho Neangmai Konyak	Mon, Nagaland
55	T. Moala	Longleng, Nagaland
56	Ethel Lotha	Wokha, Nagaland
57	Tohoni	Zunheboto, Nagaland
58	G. Ngaplih Konyak	Mon, Nagaland
59	Yenkei Phom	Longleng, Nagaland
60	Saraholi	Zunheboto, Nagaland
NB:-		
1. The selected participants are directed to report to the exhibition ground at Urban Haat at 10:00 a.m		
2. The participants are directed to keep their exhibits in their stall under lock & key. The office shall not be held responsible in case of any losses/theft.		
3. Selected participants must display genuine products with full stock, failure to do so will result in revoking their participation from the exhibition.		
4. Selected participants are informed to reach at scheduled time. In case of failure,their participation in the event will be revoked		
Managing Director NHHDC Ltd.		



TIR YIMYIM YIMOBILEM (EDITORIAL)

DIMAPUR MONDAY, MARCH (METSÜREMI) 03, 2025

Süngdong tai dak asanger asü ?

English shin o ka nung, 'Süngdong tai dak asanger' ta lir, tetezü tangatetba tai nung lenmang aibelena aoer, anungji anogomung asangyonga kecha masangzüktettsü, kechiyong süngdong nungji kecha mali ta shinür. Ibaji mesüka tanü asen lima nung asenoka tajung ka angutsü imlaa tangar dang-dang asüngdang, imlar, nüngsen jembir aser atar saka tangarba dakji kecha melira imlaba kisüng agi meimlazüktettsü aser nüngsen jembiba agia mejembizüktettsü. Aji oda, tanü asenoki asen lima asoshi terenlok mapatem inyaksü jembidang jet ta asenoki shimtetba MLA aser minister-tem dak rangloker, imlar aser parnok dak asangoktsür. Ibaji asenoki süngdong tai dak asangoktsür asütsü, kechiyong parnokji terenlok mapa inyaksürtem masü saka terenlok mapa inyaksü aser alima sünepa alitsü atema ozüng aser inyakyim yanglurtem lir. Ashiko, iba mapatongji asenoki dang masü saka parnok karibo mejangjai alitsüa akok. Iba jagi election nung toktepertem karibo MLA aser minister akümtsübaji business inyaksü asoshi tokteper amaia bilema alitsüa akok. Iba tangatetba nung, ashiko, election nung sen endok mesasai vote alir aser ayoker asütsüa akok. Iba jagi tanü election nung madoker aser tadoker aika kasasa sentsüa mautet timtemba angur. Ajisüaka, kodang asenoki MLA aser minister akümtsübaji sen aatsü atema business lenmang bushiba mapa ka masü saka nübortem nem business inyakdaksütsü aser terenlok mapa inyakdaksütsü asoshi ta angtetdir, election nung vote alitsübaji tamashi mapa ka kumadoktsü. Kasaji, kodang nübortemi pei MLA aser minister-temji parnok junga alitsü atema temzüng ozüng aser inyakyim latettsürtem dang ta angatetdir, terenlok mapa inyaksübajibo nübortem khuret kumadoktsü. Aji oda, terenlok mapatemji gari lenmang asütsüa akok, light aser tzu tajemtsü bener arutsüba mapatem asütsüa akok mesüra mozüki, school ki aser nübortem nüngdakba kiojentem yangluba asütsüa akok, item ajakji government-ibo government-i yanglutsütsü saka item mapatem asoshi endokba sen ajakji government sen masü saka nübortem sen lir aser item rongsen madak kiburji nübortem asütsü, kechiyong government-i nübortem yanglu masü saka nübortemiang parnoki parnok asoshi yangluba government lir. Iba inyakyimji kodang angatetdir, nübortemi government nung alirtemji pei nüngdak inyakdaksütsü asoshi election ajanga shimtetba lenirtem lir ta rajemtsü. Ajisüaka, tangbo asenoki shimba MLA aser minister-temji business inyaksü yok amai asenoki bilemer, anungji parnok dang sen meshir aser terenlok mapatem ajak parnok sen agi inyaksütsü amai bilemer. Aji oda, asenok lokti mungdang alitsü, moatsü aser tsüngremmung benjong amongtsü asoshi dena MLA aser minister dang sen meshir. Kasaji, Christmas aser tanurtem school admission mapang arudangbo MLA aser minister-temji pei nübortemi sen meshiba agi kidang alitsülabo masü akümer. Itemji nübortem nem süngdong tai nung asangtsüsa tangatetba agütsüba ajanga asütsü. Atangji, nübortem sen asüyonga government ajanga amshiba senotsüji amshia mapa inyaksü atema department balala nung ketdangser tulur aser zünga meteta shir mapa inyaker mongintem lir, anungji yimsüsürtemi lateta yutsüba temzüng ozüng aser inyakyim kübok item ketdangsertem jagi inyaksü aser meshitak inyakra nübortemi obendangdak ken o agütsütsü nübortem nem tashi aser temeten agüja lir. Ajisüaka, tanübo nübortemia aitepa asangtsüsa shibai ozüng aser inyakyim lateter aser shibaibo terenlok mapatemji inyakar mebendangtetka kumadokogo. Aji oda, yimsüsüri dang ketdangsertema anishir aser terenlok mapatema ajak kasa nisungtemi dang inyaker ta süra nübortem asoshi teinyaksü mapaa maka aser tachitsüa maka ta teka aser tebok tazüng toktsür. Iba jagi tanü asen lima nung nisung kar dang takar-takarba akümer aser tanünga nübortembo relief jang chiyonga election dang ataa kidang mungdaksüdagi. Ashiko, iba jagi shitakba tagitsü angutsüba süngdongji aiteptsüsa akümer südi. Tanübo nübortem dak item süngdongtemji benteta asangtsü tangatetba alitsü kanga nüngdaka kumogo.

OLEMSABANG

NI, OZÜ ASER ONOK SER SHIR ? TA ULUA BILEMBA YABO MELENSHIDI

~ L. Kika Pongener.

Asen mimchir ajak dak aketba tashimait kaji.....Ni, Ozü aser Onok ser shir ?....ta asen sasa ulua bilemba aser jembiba ya asütsü. Asen mimchirtemi aiben ken o jembishinu yimya nung, 'Ni', 'Ozü' aser 'Onok' ta asen sasa kanga-sa ulua bilemer aser jembir. Aser asenoki iba amaji asüküm tulu o jembidangji tangar aika temulong menentsür, aika temulong yirudaktsür aser aika asen dak metsütaker. Asenoki aiben aseni dang shia-metet amai bilemer, asenji dang tangar ajak dang tuluba/temaba amai bilemer, aser rongsen tangar dang nungi asen-ang kanga-sa takaba amai bilemer.....Saka aseni metetba amaji tangar-ia aikati meteta lir, asen uluba amaji tangar-a tulur aika lir, aser rongsen asen akaba amaji tangar-a taka-taiter aika lir....ta metettsüla. Aiben asenoki tangar züngshia, tangar dang akümtsübuba aser ajemalua tila akümba jagi asenok jenjang kanga-sa asoa aser ilaa akümer amai bilemer. Ajisuaka, asenoki jungjunga shisadagra, koba-teka tashitemetet lidir, koba-teka ulua lidir aser koba-teka kaa-ita lidir....Patakaji ajemalua tila akümtsüla. Shirnok kakat shisatsü/shisaliok jenjang (Degree) tulu ngua zünga metet....Parnok jagi tangar dang akümtsübur aser nisung ajak den küsasa liromedema liteter.....Saka mashi-malo nisungi dang tangar dang akümtsübuttsü memeteter aser tangar dena küsasa liromedema meliteter.....Mashi-malo nisungi dang pei sasa kanga ulua bilema ngasangadema, asüküma aser mezümeküma tangar mezüngshi-i tenuk amour o tulu jembir.

Atangji, asen mimchiri aiben asenok libaliro aser jembishinu yimya nung, tangar tenuki mongui o tulu-lu jembir....Asenoki aiben asenokjibo shitak aser ochi ama dang bilemer aser jembir.....Aser tangar-jibo meshitak aser ochi masü amai bilemer aser jembir. Asenoki aiben tangar züngoka mali, o tesashi, o tesepra aser o tulu jembir....Asenoki mapang kar nung ken o kar nung mepelai jashidang, tangar dak temeyong agi tuita, tenung-teta mezüngmeshia amokmerener.....Aser idangji asen sasa asenokji tangar dang nungi kanga-sa tashitemetetba, kanga-sa jenjang temaba/tuluba aser rongsen akaba nunga kanga-sa takaba amai bilema alitsü akok....!!! Ajisuaka, idangji tangatetertem-ibo, ashiko, asenok-jiang kanga sensamasa-a menuja alitsü sudi. Asenoki tangar dang o tesashi, o tesepra agi metenokja/amokmerena jembiba jagi asenok temeden angutsü ta mebilemtsüla....Saka asen noktakba aser asen tangatetbaji ochi aser shitak asü masü....??? Iba-jiang kanga tongtipangba asütsü. Aji oda, asenoki ajemalua, tilaküma, tangar akümtsübua, oyim-osu tanep agi jembiyongjia....Asenok noktakba aser asenok tangatetbaji ochi aser shitak sura asenok temeden angutsü. Asenoki ain adoka, o tesashi/tesepra jembia, tangar dak temeyong agi tuita, tenung-teta mezüngmeshia jembiba jagi....Tangarji tasüpeleta, adendena, tsübua, aoksatsü ta mebilemtsüla....Kechiyong parnoka pei tajemetdak, pei ametdak/noktakdak jenjangmong kabosa yur-ang tasü-ita jembir ta angatettsüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger agatsü mepishir**

Rajasthan nung Khristantem anema inyakba bulua akümer

March 02, 2025: Rajasthan state tesem ajaklen Khristantem anema inyakba kanga bulua kümдар; tang tesüsa February 25 nü Banswara district nung Khristantem tekülem sentong agia lia telok kati timtem agütsü.

Rajasthan nung anti-conversion özüng tasen benokba sülen nungi Khristantem anema inyakba tatalokba teimba kümogo.

Banswara District kübok Loharia police station nungi police-i February 25, 2025 nü Khristan aika apu. Iba district kübok Ojaria yimdak ki ka nung Khristantem sarasadem agia aliba mapang kiyong nung alir kari police nem osang metetdaksü; iba sülen police arua Khristan aika puer ao, ta kasa osang ajanga metetdaksü.

February 24, 2025 nüa Rajsamand District nunga Khristantem sarasadem sentong ka agiba sülen ketdangsertemi Pastor Dixon Lalapu.

Pastor Dixon leniba nung nija ka kidang sarasadem sentong agiba mapang nung telok ka arua timtem agütsü, iba sülen mapang tatasüka tsüngda police aru.

Ketdangsertemi Pastor Dixon'er jabaso densema nisung trok puer ao. Parnok ajak chiok

saka Pastor Dixon anema ken o benok aser pa Sub-Divisional Magistrate (SDM) Rajsamand court matsüngdangi anir ao.

Pastor nem bail agütsü saka yimtenren tsütsülen nungi tashishiba aruba ajanga pa aonung piyong judicial ket nung ayu. Tasügnü ang pa chioka liasü.

Ano Rajasthan kübok Bikaner nunga February 16, 2025 nü Khristan aika apu. Amongnü anüngdang 11:00 ako meta Pastor Samuel leniba nung nija ka kidang Khristantem tekülem sentong agiba mapang nung Vishwa Hindu Parishad (VHP) züngsemtem arua timtem agütsü. Hindu yimsü alia amangertem jagi ajok aser insang amshia Khristantem dak azükba ajanga aika yiru, talisa Haripal, Sampath aser Shobha nungerbo kanga mejungi yirua liasü.

Ketdangsertemi Pastor Samuel den Khristan tenet police station-i anir aoba sülen parnok anema FIR benok, ajisüaka Khristantem amakertem anemabo FIR mebenok.

Sabla, Dungarpur nunga Arogo kati tangartem Khristan yimsü dangi meyipdaksür ta tai tonglokja Khristan trok puer ao,

ajisüaka kari tiyongtsü aita jembiba sülen ang parnok ajjak chiok.

VHP district Tir, Anil Sharma-i, Khristantemi tangartem Khristan yimsü dangi meyipdaksütsü atema senotsü teyari sen 20,000-25,000 tashi agütsür, ta Khristantem nem tai tongloksü. Bikaner nung tekülem sentong tagidak mapang Khristantem amakdang yirur rongnung ka Haripal-i, "Onoki shinga yimsü memeyipdaksür, saka onok sarasadem sentong agiba mapang nung nisung aikati ki telungi aita onok dak azük," ta metetdaksü.

Rajasthan nung anti conversion özüng tasenba-Prohibition of Unlawful Conversion of Religion Bill 2025, taküm February 4 nü state legislative assembly nung benoka liasü. Iba Bill benokba sülen tang mezüng Bikaner nung Khristantem anema inyakba atalokogo.

Iba Bill ya agizüka özüng kümra tamangba yimsü melentsü tebilemba alirtemi anogo 60 jelia district magistrate nem metetdaksütsüla.

Iba özüng kübok aibelenertem küm 10 tashi tepuokdak ayutsü akok aser senchi-a aika achitsü.

Khristan lenirtemi sensakertem atema inyaktsü ayongzüker

March 02, 2025: Alima tesem balala nung Khristan lenirtemi G20 lenirtem dang alima tesem ajaklen sentsüh agi timtemertem yaritsü ajungshi.

Khristan denomination balala nungi lenir 125-i, 2025 küm ya Roman Catholic Arogo Jubilee küm lir, ta metetdaksü.

Laishiba nung Mosa özüng kübok küm 50 shia Jubilee küm among aser ibaji tamangertem atema tasen tetenzükba ka liasü; Jubilee küm nungji sensakertem dang sentsüh atok, alartem chiok aser kiojen ayokba tanaben meyiba agüja liasü.

Khristan lenirtemi G20 züngsem linüktem nung lenirtem dang shidi ka ajanga,

nija sen aputsürtemi income ishika aliba linüktem den sentsüh küpdangtsü atema jembishinü masür aser inyakyim menor, aser ibaji ajanga parnoki health, shisaliok aser climate change atema inyakba dang nungibo sentsüh nung teimba indoker, ta metetdaksü.

Taoba hopba South Africa yimtiba, Johannesburg nung G20 linüktem nungi finance minister tem senden menogo.

Khristan lenirtemi G20 dang Laishiba nung benshia aruba ama sentsüh alirtem dang sentsüh atoktsü aser sentsüh dak sendakba inyakyim shidak benoktsü metetdaksü.

Khristan charity telok

CAFOD nung Lead Economist, Maria Finnerty-i, "Alima nung sentsüh dak sendakba nung tashi tulu aliba linük ka ama UK sorkari yimsü lenirtemi mepishiba ama inyaktsüla," ta metetdaksü.

CAFOD-isa, "Alima nung kanga sensakertem atema rongdak süa inyaktsüla. Yimsü lenirtemi sentsüh dak sendakba kulitem ajanga alima tesem balala nung sensakertem kanga timtemba ngua onok melung raksar. Item inyakyim ajanga sentsüh aliba linüktem nung sensotem aya-tzürar, nüngdakba service balala magiteter, infrastructure majung aser climate change ajanga mejungi kongshir," ta metetdaksü.



Auertemi Little Steeping, Lincolnshire, England nung aliba St Andrew Arogo Tenla kidang nungi Victorian Mural asem auyaogo; iba nungji Mosa Özüng Ter densema lir. Tenla kidang nungi item nüngshi osettem samabaji February 23 nüang jangja liasü.

ANO GO ABEN TSÜNGREM DEN

Nüktzü pungdang aser kakettem

"Kü timtem nai züngdanger : Nüktzü nai ne pungdang nung yuang; Itemji ne kaket nung melika ma?" (T. Ken 56:8).

Nai anogoshia kechi inyaker aji züluoka ayur asü? Züludena ayuba jagi teti asenok nem tesüiba mapatem bilemtetdaksür.

Tsüngremi ne mapatem züluoka ayur ta nai metetter ma? Pa tezülubaji pungdangtem aser kakettem nung lir. Dawidi ashi, "Kü timtem, Nai züngdanger : kü nüktzü Nai Ne pungdang nung yuang; itemji ne kakettem nung melikama? T.Ken 56:8). Tsüngremi asenok jajaba anüker, aser jajaba metetter. Pa tenük asen tsütsü yoka lir.

Asenok aolen Tsüngremi angur. Pai asenok lemanng metet. Lemang kar tanüla asütsü akok, saka aji asenok kümdangtsü atema asütsü akok.

Kodang asenok ajeper Tsüngremi metetter. Pai asen nüktzü züludena ayur. Aki mapang nung mangyimba nüktzü pungdang tila nung bendena ayu, ibaji parnok tejashi noksa liasü. Parnoki aji leper nung yutsü. Kenü Tsüngremi na atema züluba aser ne nüktzü ne dang sayutsü. Iba anogo nung ne tejashi ajak tepela agi meyiptsü aser ne nü nüktzü tzüjang shiaji tepela taripi long akümstsü.

Tsüngremi ne timtem aser tejashi metetta lir. Ne tejashiji tepela akümstsü asoshi anogo ka arutsü, aser ne nüktzü jagi Pa sentsüwangshidaktsütsü.

Chhattisgarh nung Khristantem anema rally agitsü aliba thinen

March 02, 2025: Tawa kümzüksü, ta nangzüka liasü.

Hindutva lenir, Aadesh Soni-i Ketdangsertemisa, Soni-i March 1 nü Chhattisgarh state amokmerenba osang social kübok yimtsüng asem nung media nung prokshibaji Khristantem amaktsü aser rally bushisüngdangdar, aser agitsü ayongzüka liasü, ajisüaka aibelenertem nem temerenshi Khristan lenirtem densema agütsütsü, ta metetdaksü.

aikati ibaji aitsüba ajanga rally ji Iba senden tembangba thinentsüsa aküm. sülen-a Khristan lenirtem aser lokti tentet balalai tensa raksaba ayongdena March 1 nü nokdangtsü atema ken o maneni Bishrampur, Ganeshpur aser jembia inyaksangshitsü lemteta Jhanakpur yimtsüngtemi oa liasü.

Khristantem amaktsü tayongzükbaga agüja liasü.

Soni-i nisung 5000 shi Iba osang prokshiba sülen ayongdena March 1 nü yimsü lenirtem, lokti tentet balala aser özüng benokba agency aikatiji ibaji aitsü.

Chhattisgarh Christian Forum (CCF)-ia Soni-i state nung Khristantem amokmerenbaji sashia aija liasü.

Iba tensa nung ajemdaker February 25 nü Raipur yimti nung state-level Peace Committee senden ka amen. Dr Kasa senden nungji Khristan Lal Umed Singh, Deputy lenirtemi loktiliba nung yimsü Inspector General & SSP balala amangertem tsüngda Raipur aser Vijay Agrawal, SSP tesünep nung alitsü nüngdak, ta Baloda Bazar na leniba nung ashi.

amenba senden nungji Khristan Diocese Secretary den lenirtem aser local lenirtem aika Hindu aser Khristan dena liasü. organizations-ia district aser state administration-i tensa Senden nungji police-i azüoktsü atema meranga Khristan nütsüng aika aliba inyakba atema pelaba ayimtsüngtem nung security agütsütsü aser Khristantem metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tekübok**

(adj) luagi len, tsünglanglen (below, lower side)

* Ozü ki tekübok nung awatsüng ka lir.

Teküboklen

(adj) tetsünglen (lower site, below)

* Lenmang teküboklen süngdong tulu aika lir.



Tir Yimyim

OLONG PAITEP # 7079

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 7078 TELANGZÜBA**TIPIEN :**

1. Kilem, 5. Lasüng, 7. Samaru,
11. Jala, 12. Naro, 15. Langzü,
17. Sabang, 18. Arong.

LANGTSÜNGLEN :

2. Lasa, 3. Kar, 4. Ana,
5. Langtsüng, 6. Sujung, 8. Rajem,
9. Arogo, 10. Tanela, 13. Züno,
14. Lao, 16. Anu.

NAI-A YA METETTER MA

Deobarnü Champions Trophy nung New Zealand den asayaba mapang Virat Kohli ya India nunger cricket asayartem rongnungi ODI 300 nung asayaba asayar tenetbuba kümogo. India nunger rongnungitaoba captain Mohammad Azharuddin-i mezüngbuba ODI 300 nung asaya liasü. India nunger asayartem rongnungi Sachin Tendulkar (463), MS Dhoni (350), Rahul Dravid (344), Sourav Ganguly (311) aser Yuvraj Singh (304) nungeria ODI 300 aser iba dak timba nung asayaogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Assam unit APP nung tir Bhaban Choudhury kümogo

Guwahati, Metsüremi/March 2 (Agencies): Aam Aadmi Party (AAP)-i, parnok idnang national joint secretary Bhaban Choudhury, Assam unit acting tir asütsü shimogo.

AAP-i Deobarnü sangdong ka ajanga ashiba agi, Honibarnü party executive committee senden amenba mapang iba mapa atema Choudhury shimtsü ajaki mulunga agizüka liasü.

Party indang permanent tir Manoj Dhanowar, jurila kuli kar aliba ajanga mapa inyaksangshi mesüi lir aser iba mapang party-i iba mapa asoshi Choudhury shimtsü telemteba agiogo.

Dhanowar-i taoba küm September ita state tir mapa magizük tsüngda Choudhury ya AAP Assam tekolakba liasü.

Office mapa agizükba sülen Choudhury-i, yimden yimsüsüba dak sendakba nung azütokshi tali akümba, democratic longkak aitbatem remseptsüba aser opposition lenirtem aser parnok kinungertem tenüng menüksütsü atema sentong ayongzüka agiba

**Bhaban Choudhury**

atema Assam nung BJP-i aniba sorkar aija liasü.

"BJP sorkari, opposition tem ola remsepja democracy tepsetdar. Parnoki komaka tenokdangba agüjaka Assam nung aliba nüburtemi 2026 küm telangzüba tapet agütsütsü," ta pai ashi.

Sorkari, oset nung jenjang tali akümba, arem leprepba ajanga tzümopung raksatsüba aser Assam nung tzümstüng agi timtem agütsüba amala tongtimbang ken o tem

mebentetteti arudar, ta pai ashi.

"Nüburtem anogoshi temulung masüba küma odar aser iba atema telangzüba agüja BJP-i nüburtem mulung nung tetsübu idaktsütsü atema asa jenjang agidar," ta Choudhury-i shisem.

Paisa, 2026 assembly election magi tsüngda BJP sorkari nüburtem tetsübu agi anishitsü merangdar, ta ashi.

Choudhury-i, Assam Public Service Commission (APSC) ochi mashi ken o dak sendakba nung nisung kati kümtetba Justice (ret'd) Biplab Kumar Sharma Commission report aitsü aser ashiba agi iba ya yimden yimsüsüba dak sendaka aliba kuli kaket ka lir, ta ashi.

Chief Minister Himanta Biswa Sarma lenisüba nung BJP sorkari Assam indang yimden yimsüsüba ya kanga tekübokba jenjangi ludaktsüogo aser iba ya governance atema masü saka jurila tsükchiteptsü asoshi tesem ka kümdaktsüogo, ta pai ashi.

Manipur: Ali acre 25 nung poppy tsünüa aliba raksatsü

Imphal, Metsüremi/March 2 (Agencies): Manipur Police aser central paramilitary force tem longjemer meita aoba mapang Indo-Myanmar kübok Tengnoupal district nung ali acre 25 nü ozüng alema poppy tsünüa aliba raksatsüogo.

Iba tesem nung temesepba mozü anema jenjang agiba nung shilem ka ama sepaitemi Tengnoupal police station kübok Khudei-Khullen aser Khudei-Laiphram yimtsüng meita oa

liasü.

Toba ghonda 36 tsüngda Assam Rifles, Manipur Police aser Forest Division nungi ketdantsürtemi ozüng alema poppy tsünüa alibatem raksatsütsü atema jenjang agia liasü.

Meita aoba mapang sepaitemi Khudei-Khullen nung ali acre 10 nung poppy tsünüa aliba aser Khudei-Laiphram nung ali acre 15 nung poppy tsünüa aliba raksaja liasü. Parnoki raksatsüba poppy tem

ya mener liasü aser opium tazü seret 125 shi agizükla, koba regional black market nung sen lakh 1.62 yong yokla.

Iba meita aoba sentong ya Tengnoupal district Sub Divisional Magistrate matsünga benoka inyaka liasü.

Alu tulu ka raksajaka iba dak sendakba nung nisung ka danga mapu. Police-i ken o dak sendakba nung FIR kar benokogo aser ken o maneni bushisingdangtsü.

Manipur nung prangbong 747 aser bomb 330 bendanga agütsüogo

Imphal, Metsüremi/March 2 (Agencies): Prangbong injang, bomb aser hadir balala bendanga agütsütsü atema Manipur Angh Ajay Kumar Bhalla-i ayongzüka sülen Honibarnü anogo 9buba ajungba mapang prangbong injang aser bomb 42 bendanga agütsüogo.

Honibarnü bendanga agütsüba prangbong aser bomb densema tang tashi nung prangbong 747 aser bomb 330 bendanga agütsüogo. Anghi disarmament policy ya February

20 nü sangdonga liasü.

Manipur Police Control Room sangdong ka ajnga ashiba agi, prangbong injang aser bomb tem ya Imphal West, Churachandpur, Imphal East, Bishnupur, aser Tamenglong district tem kübok tesem balala nung bandanga agütsüogo.

Temetettsü kaji iba sentong benoker inyaka mapang Tamenglong district nung aliba nüburtemi tang mezüngbuba prangbong inang aser bomb tem Kaimai Police Station nem

bendanga agütsüogo. Parnoki bendanga agütsüba prangbong injangtem rongnung SBBL prangbong 17, SBBL ammunition 52, Pompei guns teku, walkie-talkies den charger sets ter, hand grenades 17 aser 12-bore ammunition belt ka densema lir.

Prangbong injang bendanga agütsütsü atema sentong ayongzüka agiba kanga takok ngua aoba sülen Angh-i iba sentong ya ano March 6 nü tashi atsülangogo.

Mulungnen O



ASO :
1962

ASÜ :
27-02-2025

Lt. Limala Pongen

Onoki teti meima alila ajemalu tetsü tajung, asür Limala Pongen (Meyilong), mapang talangka shiranga arur la akümüli tembangba anogo tashi onok den nübu, sarasadem aser rongsen agi yariteper kinunger, kidanger, arogo züngsem, yimeryimsanger, tembar, lokti tentet balala aser kija kibong ajak dang ozü mulung taroktiba nungi pelaba lemsateper.

Nenok temeim mapa tajung asoshi onoki nenok nem meyipa agütsütsü kecha maka, saka asen teyanglur Tsüngremi nenok taküm aser wadang ajak nung talubusa moajangma.
~ Temeim Kinungbu, Chirnur, Semchir & Anükabang.

UK, France & Ukraine nunger ceasefire atema sentong yanglutsü mulungtep

London, Metsüremi/March 2 (Agencies): British Ato Kilonser Keir Starmer-i ashiba agi, Britain, France aser Ukraine nungeri United States nem agütsütsü atema ceasefire sentong ka yanglutsü mulungtepogo.

Ukraine tir Volodymyr Zelenskyy aser U.S. tir Donald Trump na Oval Office nung mangatettep adokba sülen linük pezü tsüngda sensak asema sülen iba sentong ya apiteta liasü, ta Starmer-i ashi.

PM-i BBC dang ashiba agi, US tir-i Ukraine nung teti atema yimjung aginer. Paisa, America-i security guarantees agütsütsü nüngdaker ta lephsia shiogo.

Ukraine atema sensaksemtsü atema Starmer-i Deobarnü London nung Europe nunger lenirtem host süogo.

Iba summite ya Ukraine nung yimjung benoktsü atema sensaksemtsü asoshi ayongzüik, ajisüaka U.S. tir Donald Trump-i Hokolbarnü White House nung US-i teyari agütsüba atema tenüng masangba atema Ukraine tir Volodymyr Zelenskyy artsüba

agi amokbanga liasü.

British Ato Kilonser Keir Starmer, shibai linük ter dak tema aser tanga ketdangsürtem host südar pai ashiba agi, Russia-i Ukraine amakba ya anendaktsütsü atema pa mulungteter lir

Iba summit nung France, Germany, Denmark, Italy, Netherlands, Norway, Poland, Spain, Canada, Finland, Sweden, Czech Republic aser Romania nungi lenirtem, Turkish foreign minister, NATO secretary-general, European Commission aser European Council tir temi shilem agia liasü.

White House nung mepetmsü adokba sülen Europe nung aliba lenirtem aikati Zelenskyy pusemogo.

Trump-i Russia tir Vladimir Putin den yimjung atema indang indang jembitsü jenjang agiba sülen Europe animesüngzüki aruogo.

Trump-i Zelenskyy dang dictator ka ajaba aser Ukraine-i iba rara ya tenzüik ta ashiba sülen Europe nung aliba linüktemi parnok tejangraba kümzüka ayutsü atema aritepa jenjang agi tenzüka liasü.

US aircraft carrier ka South Korea tongogo

Seoul, Metsüremi/March 2 (Agencies): North Korea-i parnok indang counterattack capabilities sayutsü atema cruise missiles tem tendangba sülen tashi sayua U.S. aircraft carrier ka Deobarnü Seoul tongogo.

USS Carl Vinson aser iba indang strike group Busan rongnendak tonga aruba ya North Korea-i amokmerenba mapang U.S-South Korean military tesendaktep kanga tashi ita aliba sayutsü atema lir, ta South Korean navy-i sangdong ka ajanga metetdaksü.

June ita sülen tang mezüngbuba U.S. aircraft carrier ka South Korea-i aruogo, ta navy-isa metetdaksü.

Carrier ka yokba ajanga North Korea meit adokdaksütsü imlar, shirnoki tashitait U.S. military assets

khen atema yokba ya parnok amokmeren ka ama züngshir.

Taoba mapanga U.S. aircraft carriers, long-range bombers aser nuclear-powered submarines tem yokba mapang North Korea-i telangzüba agüja missile tendanga liasü.

Tir Donald Trump-i January 20 nü mapa agizükba sülen pai North Korea lenir Kim Jong Un den sensaksem tenzüikshitsü atema inyaktsü, ta shiogo. Trump-i jembiba dak sendakba nung North Korea-i kecha telangzüba magütsü, saka Trump tir akümiba sülen US-i anir North Korea anema jenjang tali agia arudar, ta shiogo.

North Korea-i Hokolbarnü ashiba agi, parnoki hopta tetenzüklen military indang counterattack capability tendangtsü atema strategic

Israel-i ceasefire atema nangzüktepba melenshi

Tel Aviv, Metsüremi/March 2 (Agencies): Hamas-i ceasefire atema nangzüktepba mezüngbuba shilem atsülangtsü atema memulungra timtem ajurutsü ta shia Israel-i Hamas amokmerenogo. United States presidential envoy, Steve Witkoff-i ken o ka benokba sülen Israel-i iba osang ya lemsatepa liasü.

T e n a n g z ü k t e p b a mezüngbuba shilem Honibarnü tembangogo, saka tanabuba shilem asoshi Israel-i tang tashi jenjang agia mali, koba rara teti atema anendaktsütsü asoshi sensaksemtsü atema lir.

T e n a n g z ü k t e p b a mezüngbuba shilem tembangba sülen minute ishika dang lir Israel Ato Kilonser Benjamin Netanyahu indang office-i Deobarnü iba osang ya agüja liasü.

Sensaksem tanabuba shilem kodang tenzüiktsü mesüra koma asütsü iba indang tang tashi mejangjai lir.

Deobarnüsa Israel-i ashiba agi, parnok Gaza Strip-i khu aser supply balala bener ia aliba nokdangogo.

Witkoff-i benokba sentong nung tepuoker tesadang ka (taküm alir aser asür) mezüngbuba anogo chioiktsü aser tanungbatem ya teti atema ceasefire benokba sülen chioiktsü ta shia lir, ta Netanyahu office sangdong ajangsa metetdaksü.

Kasa mapang nung Israel-isa, sensaksem takok ngua magitetra parnok ano military operations tenzüikshitsü, ta shiogo.

"Hamas-i parnok jenjang melenshira Israel-i idangjisa Witkoff plan nung keta aliba ajak atema sensaksem tenzüiktsü," ta kasa sangdogn

ajanga metetdaksü.

Israel-i Ramadan aser Passover mapang ceasefire atema nangzüktepba mezüngbuba shilem atsülangtsü atema benokba Hamas puri magizük, aser iba melenaz mezüng renemer aliba ama sensaksem tanabuba shilem tenzüiktsü ayongzüka liasü.

Israel-i teyari agütsüba nokdangtsü amokmerenba dak sendakba nung Hamas-i ashiba agi, iba ya tenangzüktepba paitoktsü aser sensaksem tanabuba nung shilem magitsü merangdangba ka lir.

"Netanyahu-i, humanitarian teyari nokdangtsü telemtetba agiba ya jenjang maketba blackmail ka, rara nung aibelen ka aser tenangzüktepba anema lir. War criminal Netanyahu-i political facts benoktsü meranger, koba pai aniba fascist army-i ita 15 tsüngda mamenoktet, kechiyong ozü nüburtemi kanga tasü ita nokdakogo," ta kasa sangdong ajanga metetdaksü.

"Pai Gaza nung pua alirtem taküm lendongbang nung toktsür tenangzüktepba ya agintsü meranger."

Netanyahu-i iba jenjang agiba ya Israel nung taitsüba aika ajangshiogo, kechiyong Deobarnü Israel nunger noklang aikati minister tem kima longkak aita Gaza nung ceasefire atema nangzüktepba tembanga yanglutsü aser tepuokertem melenteptsü khangogo.

"Mezüngbuba shilem nung anogo 16 ajungba sülen sensaksem tanabuba shilem tenzüiktsü atema Israel-i mulunga agizükogo. Ajisüaka Israel-i sensaksemtsü memulunger," ta Democrats Party lenir Yair Golan-i Israeli

media outlet Maariv dang ashi.

"Shirnoki tepuokertem chioikdaksüner parnoki iba ya angatettsüla- mapang talang ka atema ceasefire benoktsüla aser Gaza kübok tesem timba ka nungi atsüngintsüla. Netanyahu-i Israel nungertem pressure aser state of emergency nung toktsütsü atema lenmang bushir, kechiyong iba ajanga pa yimden yimsüsuba tsütsü ajangzüker," ta pai ashi.

Al Jazeera osangbener Hind Khoudary-i southern Gaza nungi ashiba agi, iba tesem nung aliba Palestine nungertem mesüngjemteti lir.

"Parnoki ceasefire ya kodang chirepjar mejangja ta bilemer. Israel nunger jet aser drone tem anüng nung maneni yimzüdar aser iba ajanga Palestine nungertemi mashi mapang ka nung Israel nunger sepaitemi mashi tesem ka amaktsü akok ta bilemer," ta lai ashi.

University of San Francisco nung Middle Eastern studies director Stephen Zunes-i ashiba agi, Israel pusema US-i onük ka benokogo.

Zunes-isa, Israel-i sensaksem tanabuba shilem nung shilem agitsü memulungba ajanga Hamas pur jenjang tamajung ka nung toktsür, ta ashi.

Kasa mapang nung humanitarian organizations temi, Gaza nung Palestine nungertem nem teyari agütsütsü atema ceasefire ya maneni benoka atatsü kanga tongtibang ta shia arudar.

January 19 nü nungi ceasefire benoker liaka Gaza indang Government Media Office (GMO)-i ashiba agi, Israel-i 350 dak temaben aibelenogo.



Yangon, March 2 : Myanmar, Shan state kübok Kengtung jila nung March 1 nü gari ka tsükokba sülen volunteer temi yirur aliba tetsür ka anir aoba noksa nung angur. Passenger 30 mena aliba passenger bus ka meküpokba sülen nisung tenet asü aser nisung 25 yirua liasü, ta Myanmar Fire Services Department-i metetdaksü.

Yuki-i tang mezüngbuba ATP 500 doubles title ka benogo



Yuki Bhambri aser Alexei Popyrin

Metsüremi/March 2, 2025 (Agencies): India nunger asayar Yuki Bhambri-i pa indang Australia nunger partner Alexei Popyrin den Dubai Tennis Championships akokba sülen tang mezüngbuba ATP 500 men's doubles title ka benogo.

Final nung tenati world No 14 Finland nunger Harri Heliovaara aser Great Britain nunger Henry Patten na 3-6, 7-6, 10-8 agi koka liasü.

Mezüngbuba set nung tamakok anguba sülen Bhambri aser Popyrin nati kanga meranga asaya-a tiebreak nung tanbuba set akok aser tasembuba set-a tenati koka iba asayamung tarep asaya koka liasü.

"Künati asaya ka nungi asaya ka dak rangloker asaya

liasü. Küna mezüngbuba round nung tsüksü liasü, anungji final tongteta takok anguba ya jangrademtsüka lir. Ni iba atema bilema maliasü," ta Bhambri-i ashi.

"Alexei ya asayar tajung ka lir aser asenok ajaki pa ya kija asayar tajung ka ta meteta lir, saka pa tarep asaya nunga career tajung lir.

"Ni tanur asüidang nungi iba asayamung yagi aruogo. Ni Dubai nung intet aser idaki junior asayamung aika asayaogo, anungji idaki meyipa arua kija asaya süang tarep asaya süang akokba ya jangrademtsüka lir," ta paisa shisem.

Iba asaya akokba sülen Bhambri Hombarnü PIF ATP Rankings nung No 40-i atutsü, koba pa indang career nung

jenjang tajungtiba lir.

Tenati iba asayamung nung kanga junga asayaogo. Tenai mezüngbuba World No. 1, El Salvador nunger Marcelo Arevalo aser Croatia nunger Mate Pavic na 4-6 7-6(1) 10-3 agi koka liasü.

Quarterfinals nung tenati 5-7 7-6(5) 10-5 agi British nunger tarep Julian Cash aser Lloyd Glasspool na akok.

Iba sülen semifinal nung tenari Great Britain nunger Jamie Murray aser Australia nunger John Peers na 5-4 4-6 10- agi koka liasü.

Kasa asayamung tebur kija asaya final nung Greece nunger Tsitsipas-i 6-3 6-3 agi Canada nunger Felix Auger-Aliassime koka liasü. Pa ya Dubai nung takok anguba Greek nunger asayar mezüngbuba kümogo.

Inzamam-ul-Haq-i cricket board tem dang IPL nung shilem magitsü ayongzük



Metsüremi/March 2, 2025 (Agencies): Toba mapang Pakistan nunger nungtugu cricket asayar Inzamam-ul-Haq-i Saqlain Mushtaq den dena Champions Trophy mepetmesü dak sendakba nung Control for Cricket in India (BCCI) aitsüogo.

England nunger cricket experts Nasser Hussain aser Mike Atherton nati India team Dubai nung tesem ka nung dang asayaba ajanga tangar dang nungi maongka tajungba angur ta ashiba sülen iba mepetmesü ya tenzüka liasü.

India sorkari, yimden yimsüsüba nung mepetmesü aser security dak sendakba nung tebilemtsü aliba ajanga

national team Pakistan-i meyoxtsü telemtetba agiba sülen ICC-i India team asayar ajak Dubai nung asayatsü atema telemtetba agia liasü.

"Champions Trophy yabo odang tokjang. Temaba jenjang nung aliba asayartem IPL nung asayar saka India nunger asayartem tanga league nung masayar. Tanga board-i IPL nung asayatsü atema asayartem yokba anentsüla. League balala atema nenoki (BCCI) asayartem meyoakra tanga board-ia iba anema nokdaksüla," ta Inzamam-i Pakistani TV channel ka nung shilem agiba mapang ashi.

BCCI inyakyim ajanga

India nunger asayartem bendanglen league tem nung asayatsü memelar. India nunger asayartem bendanglen asayatsü atema IPL aser domestic asayamungtem densema Indian cricket asaya nungi anener alitsüla. Iba asaya nungi anener aliba asayartem ya BCCI-i ayongba asayamungtemi meyipa arua masayatetsü.

Asayaba tesem atema mepetmesü ya Australia aser South Africa naprongla India den Champions Trophy semifinal asayatsü atema Dubai-i aotsüsa akümiba ajanga tali shisanga aküm.

India aser New Zealand na asayaba sülenang semi-final atema jangjatsü. India-i New Zealand kokra parnok Australia den asayatsü aser mekokra South Africa den asayatsü.

Ken o mejangjaba ajanga Australia aser South Africa naprongla renemshitsü atema Dubai aotsüsa aküm. Ajisüaka team ka ano Bodhbarnü New Zealand den semifinal asayatsü atema km2000 meyipa Pakistan-i aotsüsa akümtsü.

La Liga: Atletico Madrid temaba jenjangi tuogo

Metsüremi/March 2, 2025 (Agencies): Honibarnü Real Betis goal 2-1 agi makokba sülen Real Madrid pur La Liga title atema tetoktepba mapang takoksa tulu ajangshiogo. Real pur tamakok anguba sülen Atletico Madrid puri Athletic Bilbao goal 1-0 agi koka parnok temaba jenjangi tuogo.

La Liga table nung Atletico Madrid pur tang Barcelona aser Real Madrid naprongla dang nungi point ana agi timba lir.

Real aser Betis na asayaba mapang taoba mapang Real asayar Isco-i penalty ka idaktsüba ajanga parnoki asaya akok.

Atletico den Champions League nung asayatsü liaka title atema kanga toktepba apir Carlo Ancelotti iba asaya atema Real Madrid team team tashi tait ka yoka liasü

"Onoki Mongolbarnü yamai dang asayara asaya makoktsü," ta Ancelotti-i ashi. Pai aniba team yagi taoba Liga asaya pongu nung ka dang koker lir. Asaya nung mezüngbuba

goal ya Real atema Brahim Diaz-i idaktsü. Ajisüaka Betis atema Cardoso-i goal ka idakja goal kasasa aküm. Iba asaya nung Madrid midfielder Jude Bellingham masayai liasü.

Iba sülen asaya tanabuba shilem nung Isco-i penalty ka ajanga par team asoshi tanabuba goal idakja parnoki asaya akok.

Metropolitano stadium nung Atletico Madrid puri kanga meranga asayar asaya akok aser parnok temaba jenjang nung lir. Asaya nung Alvarez-i Atletico atema goal ka ya idakja laisü. Equalizer idaktsütsü merangba mapang Athletic Bilbao nungi asayartemi goal post nung asemben metsülökja liasü.

Atletico goalkeeper Jan Oblak-ia, asaya tenzüker tatsüka tsüngda Inaki Williams-i metsüba ball ka kanga junga nokdanga liasü.

Asaya nung goal ka ya Marcos Llorente aser Alvarez na tsüngda ball kanga junga belentepba sülen minute 66buba nung idakja liasü.

Mourinho temerenshi ajemtsüogo



jembia liasü.

Galatasaray den asaya nung referee ya Slovenia nunger Slavko Vincic liasü. Club anapronglai bendanger ketdangsür anir arutsü mepeshiba sülen Vincic nem iba asaya achayangdakja liasü.

Ajisüaka fourth official bo Turkey nunger liasü aser asaya tembangba sülen news conference nung Mourinho-i Turkey nunger referee tem maneni aija liasü.

Mourinho par team pur Turkish Cup nung Gaziantep FK den asaya nung shilem magitet aser Deobarnü Antalyaspor den asaya nunga shilem magiteti liasü.

Hombarnü asaya nung mepetmesü den medenloka oa Mourinho-i Hokolbarnü Turkish Lira 1,907,000 atema Galatasaray anema lawsuit ka benoka liasü. Galatasaray-i pai racist o jembia ta ashiba sülen pai iba ken o benoka liasü.

Mourinho, shibai Galatasaray bench nung mena alirtem shitsü ama jokzütep ta shia liasü, pai ashiba agi, pai ashiba o ya khenyongi mashileni meyiper agi.

Mourinho-i aniba Fenerbahce team ya Turkey Super Lig nung tanabuba jenjang nung lir. Parnoki Galatasaray point trok agi memenepli lir.

Metsüremi/March 2, 2025 (Agencies): Jose Mourinho indang club Fenerbahce-i mepeshiba takok anguba sülen pa nem asaya pezü atema tenokdanga agütsür aliba Turkish Football Federation-i tesadang dang kümtsüogo.

Arishi küm 62 tain Portugal nunger manager dang senchia Turkish lira million 1.6 chir aliba 558,000 dang kümtsüogo.

Mourinho indang club-i Brestbarnü sangdong ka ajanga parnoki pa nem temerenshi agütsüba anema temepishiba agütsütsü ta shir liasü.

Hombarnü Galatasaray den goal kaka danga magütsü asaya tembangba sülen Mourinho ya inyakyim ana atema merenshia liasü.

TFF-i ashiba agi, pai Turkish referee anema o tamajung jembiba atema merenshitsü aser pai mepetmesü balala adokba atema Turkish football aitsü aser Turkish football community aser Turkish referee ajak tiluja

BILEMDANGANG

"Pei akaba agi temulung süa alirtem teti pela alir."